

四庫全書

子部

欽定四庫全書

子部

古今事文類聚新集卷十二

詳校官中書

臣孫衡

侍讀

臣孫球覆勘

總校官編修

臣

王燕緒

校對官中書

臣

王家賓

謄錄監生

臣

陳炳

欽定四庫全書

古今事文類聚新集卷十二

元 富大用 撰

六曹部

戶部尚書

歷代沿革戶部尚書周之地官卿也漢置尚書郎四人
其一人主財帛委輸成帝置尚書五人其三曰民曹
主人吏上尚書事後漢以民曹主繕脩功作當工官

之任吳有戶部魏文帝置度支尚書等專掌軍國支計又置左民尚書晉初省別有度支皆主筭也惠帝時有右民尚書梁陳置左戶尚書並掌戶籍知工官之事後魏北齊有度支尚書後周置地官府大司徒卿隋初有度支尚書則并後周民部之職開皇三年改度支為民部唐因之貞觀改為戶部龍朔改為司元太常伯光宅改地官尚書神龍復為戶部宋初除安燾為戶部尚書元祐元年門下侍郎司馬光欲令

戶部尚書兼領左右曹而舊三司財用事有在五曹
寺監者並歸戶部則利權歸一詔尚書省立法左右
曹錢穀尚書兼總使周知其數量入為出而制國用
元仍唐宋舊置戶部掌民籍貢賦官吏俸祿府庫倉
廩歲計支用權衡度量法式坑冶錢幣寶貨恩賜之
事置令史分掌名頭尚書為之長

羣書要語二曰地官其屬六十掌邦教

周禮

司民掌登萬

民之數自生齒以上皆書于版

大司徒之職掌建邦

土地之圖與其人民之數以佐王安擾邦國以天下土地之圖周知九州之地域廣輪之數而辨其邦國都鄙之數制其畿疆而溝封之

以土會之法辨五地之物

生因此五物者民之常而施十有二教焉

同

司會主天

下之大計計官之長若今尚書

周禮注

大司徒齊戒受質

以百官之成質於天子

記王制

司徒脩六禮以節民性明

七教以興民德齊八政以防淫一道德以同俗

同

上帝曰

契汝作司徒敬敷五教在寬

書舜典

農父若保

酒誥

司徒掌

邦教敷五典擾兆民

周官

穆王命君牙為周大司徒弘敷

五典式和民則

君牙

鄭武公父子並為周司徒善於其職

詩緇衣序

祝鳩氏司徒也

左傳

地官理財能制於輕重

唐大詔令崔羣

制掌司徒之邦教制民曹之地征綜事帥屬居其要會

幹時通才知可典領

常集制

昔元凱之處斯職法司施行

者五十餘條以資當時之急

同

虞書五教實委司徒之

班周禮六卿爰開地官之位莫不織成都邑編緝氓黎

設九土之網維成四方之管轄班固申犬牙之制疆場

綺分應璩論馬齒之規井田鱗次戶標九等俱陳萬國

之圖人有十倫並掛三年之籍

張鷟集

注西都賦曰疆場

綺分又云原隰龍鱗之次應璩詩曰九州相錯雜相次

如馬齒

九等攸辯百姓以親

唐制

戶部之於中臺為周

司徒之職

南豐擬制

民曹上卿

同上

序首曹於左輔

賡奏類

宜參

司會之職以裨經費之方

同上

紫極八座非德莫居丹屏

六曹惟賢是擇

唐授李承嘉戶部尚書制

亦總地卿掌會計而經

國紀綱式叙征賦益饒

崔鉉制

及領地官且司邦賦會計事

劇出納孔殷投利刃而皆虛委焚絲而必理

裴垣制

古今事實

明公展足

景雲中盧從愿為吏部侍郎杜暹注鄭縣尉後為戶部
尚書盧自益州長史入朝杜立於上乃曰選人定何如
盧曰亦由僕藻鑑遂使明公展千里足

內相預政

王琚佐明皇平內難為戶部尚書帝於琚眷委特異預

大政事號內宰相

並本傳

拜官令早

蔡景歷拜度支尚書舊式拜官在日午後景歷拜日適逢輿駕幸玄武觀在位皆侍宴帝恐景歷不預特令早拜其見重如此

歲遷自擇

唐高宗以竇德元舊臣自殿中少監為御史大夫歲中遷司元太常伯又任十餘人皆帝自擇

會要

在內七年

晉杜預在內七年損益萬機不可勝數朝野稱之

主計八年

唐王紹進戶部尚書眷待甚厚主計凡八年政事多咨

訪紹亦未嘗一言漏於人

唐記

兄省許入

到洽為御史中丞漑為左民尚書舊中丞不得入尚書
下舍洽引服親不應有礙刺省評決乃許入漑省亦以

兄弟素篤不能相別也

從兄同榮

唐鄭善果為民部尚書制與裴寂等十人每奏事及侍

立並令升殿與從兄元璿在其數時以為榮

分紀

張華王佐

張華為度支尚書有王佐之才

杜預武庫

杜預為度支尚書號杜武庫言無所不有

並本傳

祿給白衣

梁何胤為左民尚書後辭官隱於若耶山雲門寺勅給白衣尚書祿胤固辭

歸讓版使

韋煥辭判戶部歸謂甥姪曰已讓版使矣

佳話錄

清儉不改

晉吳隱之為度支尚書以竹蓬為屏風坐無氈席後遷中領軍清儉不改每月所得祿纔留身糧餘悉分賑親

族本
傳

清白自脩

到溉為左民尚書溉美風儀善容止所至以清白自脩
性又率儉不好聲色

梁書

鄭有善績

唐鄭善果檢校大理卿魚民部尚書正身奉法甚有善
績

崔有風望

崔從字子乂為戶部尚書為人嚴偉立朝稜稜有風望

本傳

掌計何憂

魏文帝置度支尚書專掌軍國支計朝議以征討未息
動須節量及明帝嗣位欲用安平王孚問左右曰有兄
風否荅曰似兄帝曰吾得司馬懿二人復何憂轉度支

尚書

晉安平
王孚傳

備物置用

杜預為度支尚書內以利人外以救邊備物置用濟當時之益者五十餘條

儲義倉粟

長孫平開皇三年為度支尚書見天下州縣多罹水旱百姓不給奏令民間每秋家出粟麥一石以下貧富為差等儲之間里以備凶年名曰義倉

隋書

掌戶口政

唐戶部尚書掌天下戶口井田之政令凡徭賦職貢之

方經費賙給之筭藏貨贏儲之數悉以咨之

六典

改授刺史

唐太宗幸翠微宮授司農卿李緯民部尚書房玄齡時在京城留守會有自京師來者太宗問曰玄齡聞李緯拜尚書如何對曰但云李緯好鬚更無他語太宗遽改授緯潞州刺史

少息貪吏

宋朝李常字公擇號山房為戶部尚書常文士少吏幹

或疑不勝任以問司馬光光曰使此人掌邦計則天下
知朝廷非急於征利貪吏望風培克之患庶幾少息

長編

作會稽錄

李常為戶部尚書作元祐會稽錄三十卷

本傳

置裁省局

韓忠彥字師朴

諡文定

召為戶部尚書時元祐會稽錄初

成入狹而用廣忠彥憂之因言斂節財用遂裁省冗費

置局於戶部

本傳

古今文集

雜著

讓地官尚書表

李嶠

無涯之恩忽降霄極非據之惕坐驚魂宇其

中謝

臣少無

奇志長乏異能短步非疾於驂騑翺飛自同於燕雀逢

聖神之再造屬天地之魚容鄭璞齊竽竊混聲價秦冠

漢綬叨踐名級步鷺池之清切陟鸞渚之便蕃出入五

臺周旋三閣行膺負璽之任遂服專車之寵萬機損

益蔽於庸陋之心百揆謨猷滯於膏肓之疾爰發皇揆
特留宸眷假優閒之秩雖入杏壇參翊亮之謀尚和梅
鼎徒延舟楫之譽竟微股肱之效挈瓶之智患在於空
虛瞰室之災懼深於盈滿方陳骸骨之請遽荷雲霄之
命負乘之責前謗未除忝越之譏後恩仍及還振蜉蝣
之羽欲參龍鳳之行赤紱妨賢物知不可素飡得位臣亦
胡顏況八座樞機五曹要劇上儀七星之象旁理萬邦
之教自非元凱之明允忠肅陳韓之敦樸淳深將何以

釐正版圖擾安邦國臣之淺狹誠則貪叨朝有典章敢
贅非望伏乞回乾坤之曲澤收雨露之殊私廣訪訐謨
詳求棫樸更引食場之彥俾臨均土之司則受任得材
無愆振鷺之美官方有序不失貫魚之次

辭免除權戶部尚書狀

真德秀

文昌在從列為最高版曹於國計為甚重自仲由之才
聖門僅許以治千乘之賦況如臣之不肖而使攝大司
徒之職治天下之賦其為不稱亦已明矣伏念臣曩負

罪愆衆所指目保全覆燾盡出聖君居閒數歲而予之
祠奉祠踰年而畀之郡甫及下考遽帥全閩感激恩光
磨礱朽鈍每思興悠久之利不敢徇苟且之謀私願朝
廷假以歲月庶幾斯人受一分之賜少寬九重不忘遠
之憂區區寸忱可以對越實無一念別覬寵榮豈圖到
官俶爾四月絲綸之命忽降自天仰惟陛下更化以來
大明黜陟英髦濟濟聚在闕庭臣於是豈不願親近日
月之光筵跡鵷鴻之列而自量蹇劣莫副選掄冒昧而

前必致顛踣伏望聖慈俯照忱悃收回渙汗用穆師言

再辭免戶部尚書狀

真德秀

需章有請渙汗未回讀溫詔之丁寧重微衷之感激伏
念臣雖乏通明之識粗知去就之宜昔政在私門固合
進難而退易今權歸公室所當朝召而暮行矧惟去國
之十年常切愛君之一念每愁無路可輸畎畝之忠詎
意逢辰重瞻天日之表身未離於閩嶠心已驚於闕庭
盍即敬承敢云固避惟是天臺高選地官劇曹位在納

言難踵夔門之武職專治賦媿亡晏美之才僭瀆睿聰
冀還宸渥或改司於閒局或仍綴於舊班庶幾上無濫
予之嫌器名增重下免倖逾之媿庶恥獲全

謝除戶部尚書表

真德秀

十連竊寵媿藩閫之罔功一札遄歸叨地官之進長班
躡陪於踐斗懼深重於履冰中謝伏念臣素守朴忠濫膺迪
簡曩被初元之召首躋通服之榮自退屏於山林寢
迹違於軒陛憂時之髮益白悵去國之十年戀闕之

心為丹敢忘君於一飯屬蒙起廢再玷承流皂蓋分符
旣復既還於舊物青冥授鉞綉行仍忝於故鄉曾坐席
之未溫忽賜環之已及方躬攬宏開於公道而彙征必
萃於羣賢敢圖孤跡之漂流亦辱盛朝之記錄且民部
周司徒之職豈惟稽戶口於版圖顧尚書古納言之官
蓋實專喉舌之樞要誤拜演綸之渥冒陞曳履之華退
省駑疲曷勝螽負茲蓋恭遇皇帝陛下乾剛天健蓄懿
日新親庶政以厲精大明黜陟臨百官而昭德洞察忠

邪念臣嘗參紱索之聯知臣粗厲素絲之節輟還近綴
俾侍清光臣敢不期稱隆私勉堅初志生財有道雖慚
源流本末之知事君勿欺願竭獻納論思之報

辭免戶部尚書狀

孫覲

竊以羣胡南牧大駕東巡奸雄奮臂而呼將士倒戈而
至千官逃散萬室驚奔芻糧委於煨燼之餘金繒捐
於寇盜之手理兩朝衰亂之緒仰繫上智之明振一時之
絕之憂當重計臣之選各有司之出納制萬貨之低昂

孰能披軫於肯綮之間多多益辦是宜審聽於音聲之際一一而吹選任或非其人誤國莫大於此如臣者本以簿書刀筆備藩宣之寄又以文章言語參侍從之華忽被詔除俾承人乏今廊廟禦戎之急惟兵民足食之先宜得命世經綸之才安用老生陳腐之說智有所不及甚虞操刀製錦之傷猶有所不為何預越俎代庖之事

戶部侍郎

歷代沿革隋煬帝始置民部侍郎唐因之後改為戶部

龍朔二年改為司元少常伯咸亨元年復為戶部侍郎

郎宋戶部之職皆歸三司元豐官制行戶部始總邦

計置侍郎二員左曹五案

戶口業稅賦業農田
案檢法案知雜案

右曹

五案

常平案免役案坑場
案檢法案知雜案

左曹除陳安石右曹除李定

紹興四年七月詔戶部侍郎二員通治左右曹職事

以權吏部侍郎劉岑有請故有是命元仍唐宋舊

置戶部侍郎

羣書要語小司徒之職掌建邦之教法

周禮

地官之職邦

教是先必選國華以從人望

韓退之除崔羣制

下制民產上經

國用地官之貳實叅總焉

南豐擬制

往副民部孰如汝宜

同上

俾參版曹之繁

初寮制

君牙之貳

版表類

地卿之貳爰委典

司理財先示於簡庶利物每懲其聚斂

唐太詔令李絳

周有地

官小司徒佐敷五教魏置度支尚書以濟軍國之用政

有餘地然後庶之

常集授戶部侍郎專判度支制

善其職者為登大任

中茲選者莫匪正人

白集

古今事實

秩正貳卿

韋表微為中書舍人俄拜戶部侍郎職如故時自長慶
寶歷國家比多變故凡在翰林例無滿歲由是表微自
監察六七年間秩正貳卿備承恩渥盛于一時

進為宰相

唐戶部侍郎有二負判使按者別一署謂之左戶元和
後選舉華重宰相多由此進崔羣既相孟簡代之六典

四十位郎

晉潘孟陽為戶部侍郎年未四十其母謂曰以爾之才而位丞郎使吾憂之

三歷侍郎

李元紘歷工兵吏三侍郎上令宰臣及公卿以下精擇堪為戶部者多有薦元紘者乃拜戶部侍郎元紘因條奏人間利害及時議得失以奏之上大悅因賜衣一副

本傳

議戶版利病

楊瑒為戶侍郎帝召大臣議戶版瑒言利病甚詳帝咨賞

叙歷代戶口

唐太宗問盧承慶歷代戶口多少之數承慶叙夏已後迄周隋皆有依據

獨無進獻

李絳為戶侍憲宗問曰戶部比有進獻至卿獨無何也

絳曰將戶部錢進入內藏是用官物以求結私恩上嘉其直

不受納賂

唐牛僧孺拜戶部侍郎初韓弘入朝父子俱卒諸孤幼小穆宗命中使閱其宅簿以付家老而簿上具納賂之所唯於僧孺官側朱書曰某月日送牛侍郎物若干不受穆宗按簿甚悅居無何議命相帝首可僧孺之名

計析秋毫

張平叔國之材臣也計能析秋毫吏畏如夏日司會逾月綱條甚張況師旅未息調食方急倚成取濟非爾而

誰

白居易除張平叔戶侍制

詔視財賦

潘孟陽權知戶部侍郎詔馳驛江淮視財賦孟陽持氣

豪倨所至招金錢多補吏譽望大喪

並唐書

開河疏諫

宋元祐五年主議者執開河減水之策戶部侍郎蘓轍

上疏諫曰臣為戶曹右曹

云

戶部休戚計在此河若

復緘默誰當言者惟斷在聖心盡罷其議

例外執奏

宋柳約字元禮權戶部侍郎感激奮厲悉力盡言凡

例外宣索皆執奏以進

周益公集

財用非長

王彥威開成初為戶侍判度支彥威於儒該遠亦善吏事但經總財用出入米鹽非所長也

伏獵誤讀

蕭吳不知書嘗與嚴挺之稱伏獵為伏獵挺之曰省中

豈容有伏獵侍郎乎乃出之

本傳

自稱老奴

唐張平叔為戶侍狡險大言因王播以進既掌財用常屈公利以便私嬖倖多狎之既有寵於上進退便僻雜以優諧或自稱老奴無復大臣之體

玩狎郎吏

嘗奏事畢降階復升上每笑容之在班列玩狎郎吏譁肆無忌推鹽法請宰相為之使因自求樞機之任

同上

古今文集

雜著

太常少卿趙瞻可戶部侍郎誥

蘓軾

理財正辭禁民為非曰義先王之論理財也必繼之以正辭名正而言順則財可得而理民可得而正自頃功利之臣言政而不及化言利而不及義中外紛然朕益

厭之具官趙瞻明於吏事輔以經術忠義之節白首不衰爰自秩宗擢貳邦計將使四方之人知予以耆老舊德居此官者盖有孟徹之意焉

謝除戶部侍郎表

蘇子由

掖垣清閤奉鈇槩以媿安民部劇煩以金穀而為職事非素學命不獲辭伏念臣起於南裔曾未再募擢在近班訖無少補開口論事適宸心延納之初引筆代言非書命縱橫之際竊祿而已功何足云計日以言時亦未

幾方自甘於汰去豈復意於超升此蓋伏遇太皇太后
陛下仁聖無為靜深照物坐閱工師之衆灼知情偽之
端察臣朴愚憐臣孤遠才雖未能以應務性則不喜於
為邪試之劇曹與其來效然臣觀當今右部之政正值
昔日新法之餘召募憂於踐荒差繇患於戶少事既難
辦法當通方尚賴聖算之明稍寬民力之憊臣之疎拙
徒自勉強苟少緩於瘡痍亦圖報之萬一

再謝除戶部侍郎表

蘓子由

田野之姿入朝未幾侍從之貴冒寵已多方懷汰去之

憂敢有超遷之望

中謝

伏以右曹之政本專賦役之煩近

歲以來復益金倉之舊下闢民力上計邦儲朝廷議論

積年於茲吏民封章繼日以上置局未遑於成法付部

要責其奏功將以適四方之宜為一代之典自非精練

吏事通知民情何以上副憂勤下寬疲瘵如臣淺陋

殆難克堪此蓋伏遇皇帝陛下聖貴垂時孝先述志明

於因革之故達於利病之源上覽祖宗之成規下采今

昔之公議昭然獨斷惠此小民謂臣出自賤寒或知劬
農之意性本愚拙庶無希合之情度越衆賢付以要務
臣敢不上體聖慮勉盡鄙心

與戶部鍾侍郎書

朱元晦

熹謹東向再拜致書侍郎執事熹昨得見於省戶下忽
忽五年中間來使閩部熹方退伏田里有俯仰出入之
故雖不得瞻望履舄之餘光亦嘗以章少卿丈所致書
輒為數字之記以通於左右是後乃不敢有所關白不

自知其果能達視聽否也比來同安跼伏簿書塵土中
乃聞執事復為天子出使巴蜀萬里之外弛去逋負繕
錢之在官者以數百巨萬計弭節來還天子嘉之下所
議奏於四方擢執事置尚書省郎以計南曹二十四司
之治可謂寵且榮矣又以執事通於君民兩足之義俾
執事攝貳於版曹務以均財節用便安元元為職除目
既聞四方幽顯無不悅喜以為執事必能以所嘗施於
蜀者惠綏此民寬其財力之所不足以助天子仁厚清

靜之政也今執事之涖事數月矣四方之聽未有所聞也熹不佞竊有所懷敢以請於執事蓋熹聞之天子憫憐斯民之貧困未得其職故數下寬大詔書弛民市征口筭與逃賦役者之布又詔稅民毋會其踦贏以就成數又詔遣執事使蜀弛其逋負如前所陳者熹愚竊以為此皆民所當輸官所當得制之有藝而取之有名者而猶一切蠲除不復顧計又出御府金錢以償有司是天子愛民之深而不以利為利也明矣而況於民所不

當輸官所不當得制之無藝而取之無名若所虧少經
總制錢者乎熹以謂有能開口一言於上以天子愛民
如此所宜朝奏而暮行也而公卿以下共事媿阿莫肯
自竭盡以助聰明廣恩惠前日之為戶部者又為之變
符檄急郵傳切責提刑提刑下之州州取辦於縣轉以
相承急於星火奉行之官如通判事者利於賞典意外
督趣無所不至此錢既非經賦常入為民所逋貫官吏
所侵盜而以一歲偶多之數則為定額責使償之自戶

部四折而至於縣如轉圜於千仞之坂至其址而其勢窮矣縣將何取之不過巧為科目以取之於民耳而議者必且以為朝廷督責官吏補發非有與於民也此又與盜鐘掩耳之見無異蓋其心非有所蔽而不知特藉此為說詿誤朝聽耳計今天下州縣以此為號而率取其民者無慮什之七八幸其猶有未至於此者則州日月使人持符來逮吏繫治撻擊以必得為效縣吏不勝其苦日夜相與撼其長官以科率事不幸行之則官得

其一吏得其二三並緣為姦何所不有是則議者所謂
督責官吏者乃所以深為之地而重困天子所甚愛之
民也夫吏依公以侵民又陽自解曰此朝廷所欲得非
我曹過也夫愚民安知其所以然者何哉亦相聚而怨
曰朝廷不卹我等耳嗚呼此豈民之所當輸官之所當
得者蓋其制之無藝取之無名甚矣夫以天子之愛民
如此彼所當輸當得有藝而有名者猶一切出捐而無
所吝況如此者惟其未之知耳一有言焉其無不聽且

從矣而獨愛其言者何哉是執政任事之臣負天子也
執事誠能深察而亟言之使所謂虧欠經總制錢者一
日而罷去則州縣之吏無以藉其口而科率之議寢矣
然後堅明約束痛加繩治敢以科率病民者使民得自
言尚書省御史臺則昔之嘗為是者其罪亦無容矣於
以上廣仁厚清靜之風下副四方幽隱之望無使西南
徼外巴賁邛笮之民夷獨受賜也豈不休哉熹疎遠之
跡於執事有先君子之好而亦嘗得一再見辱教誨焉

今也適在此位為可言者誠不自知其愚且賤思有補盛德之萬分故敢獻書以聞

律詩

送李戶部侍郎自河南尹再除本官

劉禹錫

昔年內署振雄辭今日東都結去思
宮女猶傳洞簫賦國人先錄袞衣詩
華星却復文昌位別鶴重歸太一池
想到金門待通籍一時驚喜見風儀

戶部郎中

歷代沿革周官司徒屬官有下大夫蓋郎中之任也漢
尚書郎一人主戶口墾田吳張溫為戶曹郎魏有左
民部曹有農部郎中又為左人右人後又為人部人
曹皆戶部也晉兼置右民郎曹東晉及宋齊唯有
民部曹梁陳為左戶曹郎後魏為左戶曹郎北齊有
左民曹郎隋初民部郎曹置侍郎二人煬帝除侍字改
民部郎唐為郎中高宗改為戶部龍朔為司元大夫

後復故郎中負外郎各二人掌戶口土田賦役貢獻蠲免優復姍婚繼嗣之事以男女之黃小中丁老為帳籍以永業口分園宅均其土田以租庸調斂其物以九等定天下之戶以為尚書侍郎之貳其後以諸行郎官判錢穀而戶部度支郎官失其職宋元豐改官制罷三司歸戶部左右曹而三司之名始泯矣舊三司使即尚書副使即侍郎權發遣副使即權侍郎三司判官推官及判子司官即郎中負外郎之任元

仍唐宋舊置戶部郎中二人

羣書要語地官為郎

杜牧行革退之制

郎官皆為清秩

杜牧行韓實制

復以人曹郎佐掌邦計

元微之行高允恭制

叅我地官之屬首於

時俊之科

類要

詩句負外由來美郎中望不優寧知粉署裏翻作土山

頭

唐趙諫光自大理正遷戶部郎中而負外郎賀涉戲詠云

古今事實

家號郎官

唐韋維為郎嘗蒔柳于庭及憲兄弟居郎省對之輒
斂容自叔謙後至郎中者數人世號郎官家

世尚儒學

宋淳化中戶部郎中張郁父正仕至戶部郎中世尚儒

學號書樓張家

長編

戶部二妙

韋維字大紀為戶部郎中善裁剖時負外郎宋之間善

詩故稱戶部二妙

詩話

貞元十子

唐盧綸為戶部郎中有詩名於貞元中與李端司空曙

之徒名為十才子形於圖畫以美其名

同上

儒衡風采

唐武儒衡遷戶部郎論事有風采

本傳

王質方雅

唐王質為戶部郎中以方雅特立除諫議大夫

劉禹錫為神道碑

斷叔姪爭嫡

隋高構轉民部郎中時有叔姪爭嫡尚書省不能斷朝臣之議不決構斷而合理上以為能勞之曰我聞尚書郎中上應列宿觀卿才識方之古人之言信矣嫡庶者禮教之所重我讀卿判數遍詞理愜當意所不能及也賜米百石由是知名

隋書

論宰相領度支

唐武儒衡遷戶部郎時皇甫鎛以宰相領度支剥下益

上儒衡上疏論列氣象高雅論事有風采

唐書

古今文集

雜著

戶部郎官廳壁記

施溫舒

國家分置六部各統其屬屬之所治各有攸司戶部之屬五其所治之事若民訟若賦役若供餽給賜若貸財出納若倉廩委積雖各掌其一而書判之冗會計之勞符檄之多憂責畧等也中興以來五十年間凡同舍郎更代之姓名遷授之歲月漫不可攷淳熙五年今樞密

同知謝公為左曹得二石為題名未就而遷御史既登
西府諉同舍曰事求全則難成從簡則易就繇紹興至
隆興遠矣典籍雖存非一朝而能討訂也姑舉闕典豈
若首隆興之元而序次之其所未備則後之博雅君子
攷諸國史而詳焉必有任其責者同舍皆曰然於是乎
刻之淳熙八年十二月記

戶部負外郎

歷代沿革周官司徒屬官有上士蓋今負外之任後周

依馬隋開皇置民部員外郎煬帝改民曹承務郎唐
改民部員外郎貞觀明慶咸亨龍朔光宅神龍並隨
曹改復員外郎二人從六品上掌領天下州縣戶口
之事凡天下十道任上所出而為貢賦之差分十道
以總之宋尚書諸司郎中正七品元仍唐宋舊置戶
部員外郎三人

羣書要語戶部員外郎掌戶口賦役貢獻蠲免優復姍

婚繼嗣之事

唐百官志

為尚書侍郎之貳

同上

詩句錦帳隨時設金爐任意薰唯慙負外置不應列星

文

趙謙光酬
賀涉詩

古今事實

泣事有聲

唐狄仁傑薦于光明為員外郎泣事有聲

唐書

奏議第一

唐裴向累為櫟陽渭南令奏議皆第一擢戶部員外郎

同上

賞其清俊

唐戶部與吏部鄰司時吏部移牒令戶部列棘以備交通呂太一為戶部員外郎荅曰眷彼吏部銓總之司當須簡要清通何必設籬樹棘時賞其清俊

異其進獻

唐張濬累轉度支員外郎黃巢將通關軸濬托疾請告侍其母挈族避亂商州賊犯京師僖宗出幸逾年供須衛軍不得食漢陰令李康獻糗餌數百騾軍士始得食

僖宗召康問曰卿為縣令何操心至此康對曰臣為塵
吏敢有此進獻張濬負外指臣也帝異之急召至行在
拜兵部郎中

古今文集

律詩

送白敏中新授戶部員外郎西歸 白居易

千里歸程三伏天官新身健馬翩翩行衝赤日加餐飯
上到青雲穩著鞭

戶部分掌

金科

舊金部

歷代沿革周職金掌凡金玉錫石丹青之戒令漢置尚書郎四人其一主財帛委輸蓋金部之任也魏晉宋齊後魏北齊並有金部郎梁陳隋為侍郎唐龍朔中為司珍大夫咸亨復天寶改司金郎中至德復舊建中初罷劉晏鹽鐵等使天下錢穀委金部倉部中書門下揀兩司郎官准格式調掌尋復置使宋金部判

司事一人以無職事朝官充凡庫藏出納之節金寶財貨之用皆歸於三司而權衡度量之制主於太府寺本司無所掌元豐官制行郎中負外郎始實行本司事初除晁端彥參掌給納天下之泉幣計其歲所輸數歸於應受之府藏以待邦國之用而鈎考平准市舶權易商稅香茶鹽礬之數以周知其登耗凡造升斗尺秤皆以法頒其禁令若事應諮決擬書者視度支分案七

左藏右藏錢帛權易請給掌法知雜案

元戶部令史分掌

名頭有金科

羣書要語大寶曰位夏陳納貢之書聚人曰財漢有藏
錢之府莫不取之以道用之以時不役人以奉身不遣
人以供國自鹿臺重賦東夏為墟鴻都賣官西園成市

張鷟集

財用金谷有出納之政權衡度量有制作之法司

珍之任實典治焉

南豐晁端彥制

郎吏文昌之高選司珍民部

之劇曹

曲阜陳絃制

司金劇部命汝典之

孫弁制

職金之任

初寮張輔

制之

古今事實

主財帛輸委

漢置尚書郎四人其一主財帛輸委蓋金部郎曹之任

也

職林

掌庫藏出納

唐金部郎中掌庫藏出納之節金寶財貨之用權衡度

量之制皆總其文籍而頒其節制

六典

盧自無愧

隋盧昌衡為僕射祖孝徵所薦遷金部郎孝徵曰吾用

盧子均為尚書郎自謂無愧幽明矣

隋書

蕭有父風

蕭穎士字茂挺終於揚州功曹子存字伯誠為金部員

外郎諒直有功曹之風

並唐書

對及治道

宋王師愈召除金部郎官數召對言事上

孝宗時

賜書曰

比聞奏對頗及治道之具而未詳也尚有可裨政體而

宜於今者亟復條奏其眷待之渥一時在廷之臣莫得望焉

不督虛籍

王師愈為金部郎戶部尚書揚倖取諸郡積逋緡錢七百萬付金部使督之公曰此錢徒有名耳督之未必有得而文移一下所擾不知幾何人且中外一體若邦計未裕不若歸誠君父以幸寬免豈宜舉此虛籍以罔上而病民耶持其事不下

戶部分掌

倉科

舊倉部

歷代沿革周地官有廩人下大夫為倉人司祿之長掌
九穀之數賙賜蠲食以知足否蓋倉部之任也魏晉
宋齊後魏北齊並有倉部郎中梁陳為侍郎並以度
支領倉部後周地官府有司倉下大夫一人隋置倉
部侍郎開皇三年改度支為民部領之唐因隋曰倉
部郎龍朔二年改司廩大夫天寶中為司儲宋倉部

判司事一人以無職事朝官充凡倉庾受納租稅出
給祿廩之事皆歸三司而別置提點倉場官以督察
本司初除韓正彥建炎三年詔罷司農寺本寺諸倉
場事務隸倉部紹興三年復舊元戶部令史分掌名
頭有倉科

羣書要語廩人掌九穀之數以待國之匪頒賙賜稍食
以歲之上下數邦用以知足否以詔穀用以治年之凶豐
周禮倉人掌粟入之藏辨九穀之物以待邦用同上出納

必怯有司之常貳上下之價則茫昧者受敝雜苦良之

貨則豪右者受贏惟一惟公乃罔不同惟平惟實乃罔

不吉

元微之行
范季睦制

歲漕東南粟六百萬石以實中都茲用命

汝以廩人之職惟當於會計則無曠爾官

曲阜除王
宗望制

倉

庾賦入之政祿廩賙助之法臺郎典領列於右曹

南豐
除韓

正彥
制

古今事實

居部無言

唐畢緘為倉部郎中故事要家勢人鄙倉駕二部居之者不悅緘授之恬然如處美官無異言宰相知之遷職方郎中兼侍御史知雜

為屬不附

孟簡為倉部員外郎王叔文為戶部侍郎簡為其屬中

立正色凝然不附

並唐書

掌出納事

唐倉部郎中掌天儲庫出納租稅祿糧倉廩之事

六典

掌給受事

宋倉部參掌國之倉場儲積及其給受之事列案有六

倉場上供給納糶米掌法知雜

神宗正史
職官制

古今文集

律詩

送倉部蕭負外

韋應物

襍被蹉跎老江國
情人邂逅此相逢
不隨鴛鴦朝天去
遙想蓬萊臺閣重

戶部分掌

內度科
外度科

舊度支

歷代沿革漢有度支侍郎魏晉宋齊後魏北齊並有度
支郎中梁陳隋為侍郎開皇三年改度支尚書為民
部尚書始民部領之唐因焉龍朔二年改為司度大
夫咸亨元年復故掌支度國用租賦多少之數物產
豐約之宜每歲計其所出而支其所用宋度支判司
事一人列六案

度支案發運案支供案
賞賜案掌法案知雜案以無職事朝

官充凡朝度之政皆歸三司本司無所掌元豐官制
行郎中員外郎始實行本司事初除陳向參掌計度
天下之經費以貢賦租稅之入而為之出小事則擬
畫大事則諮其長元戶部令史分掌名頭有內外
度科

羣書要語鳴鶴登朝含雞伏省轉筋之敏未見稱奇聚
米之能無間播美張倉之善籌國用詎肯留情馮勤之
攷計軍儲魯何介意年支國賦為政之嘉猷歲計軍儲

邦家之要務

位參計會職綰度支

唐張鷟集

支度要部

胡文

恭行盧成制

財物多寡之數物生豐約之宜司度之曹典貳

為重

南豐除陳向制

度支掌支度國用租賦多少之數物產豐

約之宜水陸道路之利每歲計其所出而支其所用

六典

古今事實

自職度支

狄梁公以度支之司天下利害部常闕人求之未得乃

自職之

唐職林

始有副知

蘓弁授度支郎中副知度支事仍命立於正郎之首有

副知之名自蘓弁始也

六典

奏數千言

崔仁師為度支郎中嘗奏度支財物奏數千言手不執

本太宗令杜正倫齎本與仁師對唱一無差殊太宗大

奇之

唐書

判出入案

唐故事度支案郎中判入負外郎判出侍郎總統押案而已

奏理奪田

張仲方少朗秀父友高郢見而奇之曰此子非常必為國器後為金州刺史郡人有田產為中人所奪仲方三疏奏聞竟理其寃入為度支郎中

勅求杜若

貞觀中勅下度支求杜若省郎以謝朓詩云芳洲采杜

若乃責坊州貢之當時以為笑

筆談

元理善筭

曹元理善算回筭知二國之粟不差升斗也

西京雜記

魚領三曹

宋徐宗說在度支會右曹金部皆闕官因令魚領三曹

金穀纖悉之地而宗說素有心計於天下經費出入盈

縮之數莫不通知老吏為之斂手

中興錄

古今文集

雜著

論度支疏

權德輿

十一月十二日將仕郎守右補闕臣權德輿謹昧死頓
首上疏皇帝陛下臣聞建官惟賢任人以器細大畢效
轅輻無遺蓋就其所長以求至當古人所以有優於趙
魏而劣於滕薛敗於粟邑而理於潁陽誠才各有所極
也伏見司農少卿權判度支裴延齡早以文學累居官
次固而似守刻而少通徒有專勤之心且非適時之器

往者貳大農之卿長司太倉之出納號為稱職盖有恒
規陛下急於獎能切於賞善權委邦賦異有成績且度
支所務至重量入為出從古所難使物無遺利而不可
竭竭則害生類使奸無隱情而不可刻刻則傷人和調
其盈虛制其損益上繫邦本下繫元元苟非全才通識
則有所壅自延齡受任已近半載羣議紛然皆曰非宜
且權其輕重固與守之之才不同遑儲經費之切懋遷
移用之法貴無留事以酌乎中簿領簡書周行郡國失

於毫釐利病相萬一物未理所軫皇情而延齡切於感恩昧於量功思有以效強所不通則有枉尺直尋之心多方自固之計吏伺其隙人售其奸因緣蒙蔽觸類滋長致遠恐沉學製實傷異時甚敗罪之何補伏料聖意久未正授延齡職名似觀其能否以為進退官司閭里衆口一心評議諠譁所不可遏伏望與一二宰臣時有裁議或詔問度支郎官使得以事實條對苟言者緣妄盍有以辨之或才實未稱恐難久處儻擇能代命以他

官以全延齡以便天下上副求理之意下遂陳力之宜
則事任交脩職業不廢臣忝備陛下諫諍之官常服師
訓緘默自負無以為容阮嗣宗口不言人之短臣心常
師之但以束帶立朝則異於是職當獻納豈敢顧身耳
有所聞心有所見義在無隱以奉聖明言而獲戾臣之
死所不勝愚瞽惓欸之至伏惟陛下裁擇

戶部分掌

糧草科轉運天下糧
草急關規畫等事

舊糧料院

歷代沿革宋仍舊制以三司大將軍為都糧料使自開
寶六年以著作佐郎陸光範充改用京官自此始太
平興國五年分諸司馬軍步軍為三院八年以馬軍
步軍合為一院雍熙四年命供奉官陳處晦勾當諸
司糧料供奉官曾祚勾當馬步軍糧料自後復分
馬步軍為兩院或以諸司使副分主之端拱二年復以
京朝官主之元豐末併馬步軍與諸司為二院隸太
府來掌以法式頒廩祿凡文武百官諸司諸軍奉料

以券準給中興以來行在有諸軍諸司糧料院鎮江
建康有分差諸軍糧料院鄂州有分差戶部糧料院
四川總所有分差戶部魚關糧料院分差利州戶部
糧料院六院官例以京官知縣有政績者為之故恩
疏數畧視職事官而不入雜壓紹興間胡汝明以料
院除監察御史遂遷副端乾道復相繼入臺者有宋
敦書等數人而六院彌重號為察官儲矣紹興間復
入雜壓淳熙間削去近歲復舉班在五寺簿下太學

博士上元戶部令史分掌名頭有糧草科

羣書要語宮正均其稍食又云月終則會其稍食

周禮

古今事實

躬自檢校

宋汪大猷字仲嘉幹辦行在糧料院文書盈几日不給視公間摘一二無不切中老吏驚嘆謂未有也或言摧貨務左藏庫有羨儲朝旨以委公躬自檢校得其實以

對

樓攻媿集

除太常簿

宋林正惠公大中字和叔幹辦諸司糧料院求外補同
擬者四人孝宗指公與計衡姓名曰此二人佳可除職
事官遂除太常寺簿

同上

戶部分掌

審計科審計天下見
在錢帛可支年月

舊審計院

歷代沿革宋以三司使總邦計司各有院以秉中外泉
穀出入之政蓋會計之府也然案牘叢委典者不能

徧察而奸容焉淳化三年始用戶部使樊知古奏剔其冗籍復別為院置官領之以聽稍食之要貳置院之初特掌騎兵徒兵給受之數猶未及諸司也元豐三年合步騎兩院為一遂以其一主諸司上自宮禁朝廷下至斗食佐史凡賦祿者以式法審其名數而稽其辟名者唯效賜給已乃審祿有疑予則詔以法凡四方之計籍上於大農則逆其會凡有司議調度會賦出則諏焉設負二曰左右聽分案令史八人舊

為諸軍諸司專勾司建炎元年改諸軍諸司審計官
元戶部令史分掌名頭有審計科

古今事實

以為關鍵

宋紹興五年臣寮言臣竊惟國家之賦祿以糧審為關
鍵糧審之勘給以法令為承式

中興
會要

不交權要

宋辛次膺監諸司審計司未嘗登權要門參知政事孟

庾被詔薦其才遂召對是日除駕部員外郎

胡濬庵集

古今文集

雜著

審計院廳壁記

吳博古

審計非古官也而原於古古者凡官府皆有要會而財用稍食之會尤詳國初以三司使總邦計司各有院以秉中外泉穀出入之政蓋會計之府也然業牘叢委庶者不能徧察而姦容焉淳化三年始用戶部使樊知古

奏別其冗籍復別為院置官顓領之以聽稍食之要貳
置院之初特掌騎兵徒兵給受之數猶未及諸司也元
豐三年合步騎兩院為一遂以其一主諸司上自宮禁
朝廷下至斗食佐史凡賦祿者以式法審其名數而稽
其辟名者唯效賜給已乃審祿有疑予則詔以法凡四
方之計籍上於大農則逆其會凡有司議調度會賦出
則諏焉設貳二曰左右聽分案令史八人然夷考縣官
祿賜之費月長歲滋如江河下流愈遠愈濶其浸淫未

易隄障也自至道末歲給中都官吏不過十數萬紙熙寧月四萬今又倍之百司吏祿又靡耗特甚蓋居兵費四之一豈據勝涉筆者曾無掇於經費抑端本澄源不在有司歟然糧審為大農關鍵倘據會要而觀則蟻穿必有蹊蠹藏必有穴損益本末蓋可覩已院故無記前人名氏不傳三山林君湜建安周君曄斷自南渡緒次官簿鏡之石亦不苟於其職矣故為書職掌大畧於其端以詗來者院舊曰專勾中興避御嫌名更今名云

淳熙十四年九月既望記


審計院題名記

吳博古

秋九月諸司審計司作題名屬余為之記江陰呂君槩廬陵孫君逢吉造余曰兩院皆君昔所涖寧獨遺其一也敢繼以請余觀舊事自淳化綿蕝之始以三班掌事後稍更用京朝官中興選任尤寵善職者徑登郎省將使指近比非試邑有聞者不在選中臺有缺屬於焉是擇士脫州縣登朝於焉問津其輕重視昔何如而官是

者昧焉不見姓名於後寧非缺歟諸君蒐補闕遺而余
陳朽亦牽聯得書寧非幸歟顧併征余文將為兩院重
茲幸也寧非辱歟余曩嘗閱軍簿會兵費竊喟然嘆曰
本邦維財蠹財惟兵觀本與蠹相盛衰蓋即是焉觀之
試挈一歲審放之最錢以緡計糧以斛計帛以疋計續
以兩計者百二十有四億僅足以贍中都之兵列戍三
垂者不預焉秦漢以來雖或連兵曠歲費不擬此今橐
弓柔遠期與天下休養而無涯之費如故民力安得不

屈耶惟九重儉慈不以一毫妨經費曰民與兵是恤是圖是以民無怨咨曰縣官所以征取於我者凡以衛我也兵無缺望曰縣官所以衣食於我者極此固不薄於我也然欲使兵絕虛籍國不徒費士得全廩師以不饑則任職者可不閔民力之不易念官賦之難支悉意審覈以佐公家之萬一乎沿革本末大畧與諸司同不復書姑以所嘗更者書以為後遺淳熙十四年十月四日記



古今事文類聚新集卷十二

欽定四庫全書

子部

古今事文類聚新集卷十三

詳校官中書臣孫衡

侍讀臣孫球覆勘

總校官編修臣王燕緒

校對官中書臣王家賓

謄錄監生臣陳炳

欽定四庫全書

古今事文類聚新集卷十三

元 富大用 撰

六曹部

禮部尚書

歷代沿革禮部尚書周之春官也漢成帝置尚書四人
其四曰客曹主外國夷狄事光武分六曹吏部曹兼
掌選舉齊祀事皆禮部也魏尚書有祠部曹東晉置

祠部尚書掌廟祧之禮宋祠部尚書領祠部儀曹二
曹齊梁陳皆有祠部尚書後魏稱儀曹尚書後周依
周官置春官大宗伯卿隋為禮部尚書唐因之龍朔
改為司禮太常伯咸亨復舊光宅為春官尚書神龍
復舊宋元豐正名始除尚書闕元祐六年以梁燾為
禮部尚書元仍唐宋舊置禮部掌凡禮樂祠祭燕享
貢舉釋道四方便客諸蕃進貢犒設帳設之事置令
史分掌名頭以尚書為長

羣書要語三曰春官其屬六十掌邦禮周禮宗伯掌邦禮

治神人和上下

書周官

帝曰咨四岳有能典朕三禮僉曰

伯夷帝曰俞咨伯汝作秩宗夙夜惟寅直哉惟清舜典乃

立春官宗伯使帥其屬而掌邦禮以佐王和邦國周禮大

宗伯之職掌建邦之天神人鬼地祇之禮以佐王建保

邦國

同上

夏父弗忌為宗伯左傳

宗伯秩禮是為大僚

李絳制

春曹尚書

元稹行王播制

禮臣不佞

燕許公碑

春官古卿是用授汝

南豐

擬制擢登宗伯之曹上應文昌之位

晏公類要

實在南宮之列

牋表 類 典朕三禮大舜委於姜夷分勅六卿成王任於彤

伯建茲歲首寔曰春官敦叙九族之親欽若五常之

教祀天郊地之典舉其宏綱朝日夕月之儀撮其機要

張鷟集 昔舜命伯夷典禮后夔典樂至周并為宗伯之任

今禮部尚書蓋其任也南豐擬制 正禮闈以充負眷惟千古

之儀文特付一時之雋彥故從劇部移寘清曹牋表記 光

明畫省務總要樞建禮仙門職惟喉舌張錫制 典禮之於

有司非人莫濟秩宗之於省戶其選則高同 五星懸暉

差池紫宮之典百官根本聯曹建禮之門

蕭子範表

詩句及乎貞觀初尚書踐台斗注以王珪拜禮部尚書

後以侍郎執政

杜送王評事

古今事實

管攝二曹

後魏孝文征馬圈留宋弁兼祠部尚書攝七兵事及行

執手曰國之大事在祀與戎故令卿管攝二曹

北史

授卿二職

唐高宗謂裴行儉曰卿文武兼資故授卿以二職即日拜禮部尚書兼檢校右衛大將軍

報卿直言

陳叔達初建成元吉疾害太宗陰行譖毀高祖惑其言將有貶責叔達固諫乃止太宗時拜禮部尚書勞之曰武德間公有直言故以報卿

召入決事

睿宗朝薛稷為禮部尚書以翊贊功每召入宮中與決

事恩絕羣臣

筮得鼎卦

李綱字文紀初仕隋官不進筮之得鼎卦筮人曰君當

為卿輔待易姓乃如志至唐終禮部尚書

唐書

藝如襪線

偽蜀韓昭仕為禮部尚書琴棋書算射法悉皆涉獵李

台穀曰韓八座仕藝如折襪線無一條長

北夢瑣言

洒善禮經

唐崔沔歷秘書監太子賓客既善禮經朝廷每有疑議皆取決焉卒贈禮部尚書

稷議配饗

宋豐稷為禮部尚書哲宗升祔議功臣配饗稷以為當用司馬光呂公著或者謂二人得罪於哲宗廟或不可用稷曰止論其有功於時爾如唐五王配享中宗豈非得罪於中宗者哉

通鑑

止高麗市書

高麗貢使請買書籍朝廷以故事盡許之禮部尚書蘓軾言漢東平王求諸子太史公書猶不許今可與乎詔曾
經買者許依例同上

却西蕃貢馬

宋元祐西蕃有貢駿馬汗血者事下禮部軾時為宗伯
判其狀云朝廷方却走馬正復汗血亦何所用事遂寢
蘓東坡三
馬贊序

古今文集

雜著

禮部長貳壁記

洪邁

起建炎丁未至今三十四年凡禮部侍郎尚書名氏可見者毋慮五十有八人其在事歲月若除舊拜新雜出於掌故省臆或脫不具然大畧在是矣自元豐定官制歸天下萬務於文昌曹分賦職頗采用周官唐六典尚書品第二侍郎品第三皆法從屬車間朝廷所以尊榮之甚寵由是得政者鴈行立然要為具負吏朝日而坐

出曹弊治不過操牘視成振之以章程柅之以挈比思
慮索於几案此其勢不能得施置自便獨宗伯不其然
間平時繩墨要會疑亦王官之一守有日天子舉遺典
禮大朝聘大慶賀與天地宗廟典策秩享之事衆史贊
聚閣筆詞不占措乃雍容風儀斟酌故實援之古可驗
揆之今可行者繫吾啓為之非特規守成法視故府鍾
鼓玉帛周章有司之後而已則上所選置正用第一品
亦其理宜中興之宰十四而以是進者六故相國義陽

公清河公江寧公吳興公今相國縉雲公弋陽公礪礪落落如乘蒼龍騎北斗淵耀下飾烜然一時固宜登載表暴使後之君子有所瞻依新安金公乃命郎吏謹具年次書諸石紹興三十年九月初一日記

辭免禮部尚書兼翰林院奏狀 周必大

自天有命無地措躬臣竊惟掌禮代言班高選遴國初陶穀雖嘗兼領然宗伯猶是階官未率屬也元祐中獨蘇軾文章學問稱此兩職然亦先後迭居不聞並命自

紹興至于乾道沈與求孫近胡交脩楊椿汪應辰俱是
六卿祇帶兼權學士有以見名器之重不輕畀付如此
今臣至愚極陋無一可取積繇遭遇徧歷清華懷感恩
之意而口不能宣堅報國之誠而力不能逮前此奏對
每及祖宗時居內制者大率久任則臣拳拳之志粗亦
可推第緣宿恙侵凌未免傲求間散陛下海涵天覆已
極隆寬乃復過有褒遷超視二品直兼翰苑度越前規
寵厚而愈加位高而益進方聖主大開公路臨照百官

何乃眷私小臣獨用其至此臣所以既懷滿盈之懼又
慮仰玷聖明涇壑籲天殆不容已伏望睿慈鑒臣悃悞
非敢禮辭特頒詔旨亟寢成命清資異數留待奇才庶
安危東迄荷保全之賜

謝除禮部尚書兼翰林學士表 周必大

宗伯綴文昌之坐已高曳履之班翰苑依華蓋之星尚
玷縉綸之直當聖主謹持於公器獨愚臣常愧於私人
中謝臣竊考自古豪英之才旋觀當今文學之士或抑厭

草茅之下或陸沉州縣之中瞻城南尺五之天致身無
路想玉階方寸之地通籍幾人況乎出入禁嚴周旋侍
從論思獻納日邇清光衣被服成歲叨徽數向匪負
一時之望安能符衆論之公如臣者學不足以知方才
不足以應務家壁四立甘為窮陋之民君門九重敢起
躋攀之念而自親逢聖作首奉詔除簡知特厚於衆臣
獎擢徧更於華貫官益崇而效寡祿愈富而報微左降
固宜右遷何有忽拜便蕃之命疊加優異之恩帥屬春

官光貳卿之舊次搞文禁苑忝四命之新榮煥寶帶以
章身飾繡鞵而驚駭正使寶魚數器尚虞稱塞之難矧
伊初乏寸長何意超踰之甚周章就列俯仰懷慙此蓋
伏遇皇帝陛下道叶舜華志恢禹迹明明在上雖洞照
於羣情浩浩其天每包涵於萬類寧稍捐於爵秩恐或
棄於菲葑遂致凡才亦塵顯仕臣敢不悉其思慮稱是
寵褒號令文章期昉漢家之制討論潤色勉晞鄭國之
賢苟逌素殫豈醅洪造

禮部侍郎

歷代沿革隋煬帝初置禮部侍郎唐因之龍朔中為司
禮少常伯咸亨復舊掌策試貢舉及齋郎弘崇國子
生等事舊制考功員外郎典貢舉開元中李昂為進
士李權所詆朝議以考功位輕不足以臨多士次年
遂以禮部侍郎掌焉宋元豐正名除戶部侍郎謝景
溫為禮部侍郎自此始正除尚書闕元仍唐宋舊置
禮部侍郎

羣書要諫小宗伯之職掌建國之神位

周禮

禮部侍郎周

之春官小宗伯也

六典

貳宗伯之掌禮典諸侯之貢士

職類

唐制可使典禮以和神人可使考文以第俊秀

白集韋貫之制

擢以公望貳于秩宗豈惟神人之和兼舉孝秀之目

職類唐制

秩亞春官

南豐擬制

稱秩元祀春官舊職舉秀興賢

國朝兼領非文儒碩茂裁鑒精實重于一時者不在此

也

職類

禮聞儀曹典郊祀之禮獻賢能之書今小宗伯實

兼二事非直清公正者不足以處

白集授韋貫之禮侍

詩句望郎到處覺風生

鄭谷和禮部盧侍郎

南宮吾故人白馬金

盤陀雄筆映千古見賢心靡他

杜甫寄禮部賈侍郎

古今事實

侍郎入相

常袞自禮部侍郎入相時潘炎為舍人引麻因戲之曰

留取破麻鞋著及袞視事不浹旬果拜

南部新書

學士加榮

賀知章從太常少卿遷禮部侍郎兼授學士一日併謝

訖謁宰臣源侍中曰賀公久著盛名今日一時加二榮
命並為學士之光輝雖然學士與侍郎二者孰為美燕
公曰侍郎自皇朝已來為衣冠之華選自非履歷清要
望實具美者無以居之雖然終是具負之吏又非往賢
所慕學者懷先王之道為縉紳軌儀蘊揚班之詞彩兼
遊夏之文學始可處之無愧二美之中此為愈也

唐書

父子南省

崔挹子湜先是湜為兵部侍郎挹為禮部侍郎父子同

為南省副貳有唐以來未有此事

兄弟禮部

崔氏兄弟六人邠鄆凡為禮部五吏部再居光德里
構便齋宣宗曰鄆一門孝友可為士族法因題曰德星堂
後京兆民即其里為德星社

並唐書

重於宰相

韋純為禮部侍郎取士抑浮華先行實嘗從容奏曰禮
部侍郎重於宰相帝曰侍郎是宰相除安得重曰然為

陛下東宰相者得無重乎帝美其言

選多公卿

唐賈餗為中書舍人後正拜禮部侍郎所選士七十五人得其名人多至公卿

韋涉裁鑒

唐韋涉字殷卿為禮部侍郎於裁鑒尤長

本傳

柳璟寬信

唐柳璟字德輝為禮部侍郎為人寬信好接士稱人之

長遊於門者他日皆顯於世

瑞柳試士

呂渭字君載遷禮部侍郎始中書省有古柳建中末枯
死德宗自梁還復榮茂人以為瑞柳渭試進士取瑞柳
為題帝聞而嘉之

唐書

梯牆決事

惠文太子薨詔禮部選挽郎侍郎賀知章取捨非允為
門蔭子弟喧訴盈庭知章於是以梯登牆首出決事時

人咸嗤之

舊唐書

直言時政

宋劉正夫字德初除禮部侍郎芻見詔求真言正夫條

奏時政十餘事大略重名器輕賦斂戢干戈節賜予選

人材惜民力鑒祖宗成憲謹持盈守成之道徽宗嘉納

之

東都事畧

抗聲和議

宋禮部侍郎曾開知婺州先是秦檜語和議曰此事大

係安危開於坐中抗聲曰丞相今日不當說安危止合

論存亡爾檜矍然驚其言遂命出守

中興繫年錄

不宜輕出

宋中丞張守

諡文靖

除禮部侍郎力辭不拜上命呂頤浩

召至政事堂中諭以正人不宜輕去朝廷守乃受命

中興

繫年錄

當專任用

宋張魏公復除知興元府已登舟除禮部侍郎召對便

殿上慰勞宣諭曰朕將有為正欲一飛冲天而無羽翼者卿為朕留意當專任用

朱晦菴集

古今文集

雜著

謝轉禮部侍郎表

范文正

渙渥自天震惶無地循墻弗獲致冠是虞謝伏念臣布素寒淒斗筭微器初縻下士之祿忽塵上聖之知歷踐近班嘗預大政深自感激詎為因循仰祖宗之謀請行

故事懷社稷之計動發危言雖欲必盡其心奚能久安
於位遽彰無狀誠合有誅而聖意始終天慈曠蕩尚寘
名於秘殿復蒙幸於善藩介拙云藏人言用息莫聞課
最敢覲龍光伏蒙皇帝陛下雷霆震威日月還照未忘
圖舊不次推恩擢登宗伯之曹上應文昌之緯職命如
故爵數甚隆徒執讓以弗諧正服榮而為懼臣敢不夕
惕三省寅恭一心進而盡憂國憂民之心退則處樂天
樂道之分上酬聖遇用竭愚衷

謝除禮部侍郎表

周必大

掌秘府之圖書久玷英游之列奉甘泉之筆橐駝汙法
從之班恩厚踰涯感深次骨

中謝

臣聞知人繇乎堯哲分

職著於周官明三德以有家所以撫五辰而凝庶績佐
六卿而率屬所以倡九牧而阜兆民何畏巧言其惟古
士如臣者以一介甚疎之跡荷兩朝特達之知槐市蓬
山早塵華選烏臺鸞掖浸陟要班洎中返於江湖亦
旋歸於覲闕踰年于此片善莫聞心跼蹐以不安顏忸怩

而罔措所期顯黜乃誤殊遷惟宗伯古之清曹惟貳卿
今之撫仕禮樂自天子出雖上稟於聖謨籩豆則有司
存當俯求於故實夫何鄙朴而許攝承夙夜直哉惟清
莫遂夔龍之遜文章煥焉可述更慙垂馬之工茲蓋伏
遇皇帝陛下冠古聰明御圖勤儉辨臣鄰之邪正昭示
抑揚閔風俗之墮偷力加勸沮知臣雖無可用之實察
臣粗有不欺之愚特假寵榮伴陪亞旅臣敢不益堅素
守更厲丹心效守職之小忠詎塞論思之責竭事君之

大節或酬覆燾之仁

辭免禮部侍郎兼直院兼侍讀狀 真德秀

內史之除俶逾三日秩宗之命遽下九天仍經幄之新榮兼詞林之舊直此前代崇儒之典寂謂寵光矧嗣皇訪落之初可輕畀付顧如某者自視闕然禮樂詩書少雖涉獵文章翰墨久已荒疎分間二年憂民一意瘁痾由已敢辭夙夜之勞毫髮無功徒致陰陽之寇精神耗憤形體支離頃屬夏秋之交嘗陳香火之請蒙恩未許

竊廩是慚詎意龍飛首頒驛召甫登西掖旋貳南宮陳
善責難蓋平時之自詭尊經好學迺盛旦之親逢所願
依日月之光期或遂涓埃之補而某自嬰宿疾未底全
安簡策舊文都忘前習記牋常語且出他人豈堪持衰
憊之身而輒造清華之選仰祈敷奏俯徇愚衷祿賦祠
庭庶少瘳狗馬之疾心存帝闕終願輸螻蟻之忠

謝除禮部侍郎兼直院兼侍讀表 前人

龍飛九五幸逢真主之興驛召再三俾造邇臣之列職

親地邃恩鉅人微

中謝

臣竊惟國勢之重輕率視人材之

聚散王多吉士則若鳴鳳之集梧桐朝有直臣則若猛獸之衛藜藿和聲聞而妖聲自息正氣勝而邪氣罔干是以元祐首年盡起諸老隆興初政畢萃羣賢正塗既開治象可卜於赫盛旦邁邁先猷宜得白首耆父之英以重清時獻納之選伏念臣學雖志道材弗瘳人忝乙第於慶元臨軒之初綴三館於嘉定改絃之始鼂靡久直曾微華國之文螭陞屢前徒抱愛君之志越從持節

游易守藩尚期宣室之席前忽痛鼎湖之弓墮義輪東
出方薄海之仰瞻漢扎西來先時髦而收召身未登於
詞掖班已獵於儀曹金華玉堂假儒臣之榮寵蘭臺石
室窺太史之秘藏自惟何人叨此殊獎茲蓋恭遇皇帝
陛下德全純懿學務緝熙念皇天后土之監臨居懷兢
畏察君子小人之消長實兆興衰謂臣雖無適用之材
知臣粗有不欺之節擢躋邇服許貢微忠臣敢不戒在
苟容期於美報惟禮可以為國願廣晏嬰之言非道不

敢前陳竊效孟軻之敬

律詩

寄王侍郎放榜

劉禹錫

禮闈新榜動長安
九陌人人走馬看
一日聲名徧天下
滿城桃李屬春官

禮部郎中

歷代沿革周官大宗伯屬官下大夫蓋郎中之任也魏
晉宋齊梁陳後魏北齊有殿中郎儀曹郎殿中掌表

疏儀曹掌吉凶禮制皆禮部郎中之職也後周依周
官隋禮部曹置侍郎一人煬帝改儀曹唐因之稱郎
中武德二年復為禮部龍朔二年改司禮大夫光宅
神龍隨曹改復宋元豐正名初除劉贊王子韶為之
大朝會則上書奏藩國貢物凡慶賀若謝則郎中負
外郎分撰表文建炎三年詔禮部郎官一員兼主客
元仍唐宋舊置禮部郎中

羣書要語春官之屬

晏公類要

容臺是則僊闥咸推

唐彭景直禮部

郎儀曹之任實藉文雄郎吏之選必資時秀

唐授禮部郎制

張

燈起草譽動南宮

許公集

賜筆禮闈進席天臺之屬

張賈制

裁書南閣

常袞制

太微之星郎位甚近宗伯之屬禮闈最

清

公是謝表

俎豆之議著為典常賡奏之文傳為口實秩清

任重時儒所貴不次之用多此途出

曲阜行上官均制

儀曹郎

選叅訂禮丈兼職賧奏非富儒學未易處也

同上

掌佐尚

書侍郎舉其儀制而辨其名數掌凡五禮之儀二百五

十有一

六典

掌禮樂學校儀式制度衣冠符印表疏冊命

祥瑞鋪設喪葬贈賻及宮人等

通典注

詩句惟此禮部公

東坡也

寒泉甃舊井滴此久羸瓶召還

及脩綆

山谷

須知百日掌絲綸

禮部百日內須知制誥故王元之與宋給事詩云

古今事實

真儀曹郎

孔過為齊尚書儀曹郎屢箴闕禮多見信納上謂王儉

曰孔過真所謂儀曹郎也

南史齊書

解朝儀者

梁武帝問徐勉求一有學藝解朝儀者為尚書儀曹郎
勉曰孔休源識見精通詳練故事帝即日除儀曹郎每
建議訪問前事休源即以所誦記隨機斷決曾無凝滯
吏部任昉常謂之孔獨誦

梁書

南宮舍人

舊說禮部郎中掌省中文翰謂之南宮舍人

唐職林

宋神

宗與宰執議更官制至禮部郎中曰此南宮舍人非他

曹比可除劉摯

王鞏聞見錄

名表郎官

宋元豐官制禮部郎中謂之名表郎官別有印曰名表

部郎

石林燕語

辭章自名

唐薛稷字嗣通為禮部郎中以辭章自名

論議無屈

唐李翱為禮部郎中性峭鯁論議無所屈見宰相李逢

吉面斥其過失

並唐書

奏議詳雅

唐王宏中在禮部奏議詳雅省中服其能

韓愈撰
墓碑

大儀專委

唐劉查字士深博綜羣書為儀曹郎僕射徐勉以臺閣
大儀專委查焉

止加尊號

宋劉敞字原夫天子將親大袷于太廟丞相欲加上尊
號公以禮部兼領名表丞相請撰表公說止之遂上疏

章凡四天子得公奏曰我意本謂當如此遂斷章表不

受公於是忤時相

言行錄

撰賜衣表

舊大朝會等賀及春秋謝賜衣請上聽政之類宰相率百官奉表皆禮部郎官之職大觀以後朝廷慶賀事多非常例郎官不能得其意蔡京乃命中書舍人雜為之既又不欲有所去取於是間參取首尾或摘其一二聯次比成之當時謂之集句表禮部所撰惟春秋兩謝賜

衣表而已

石林燕語

古今文集

雜著

禮部郎官廳壁記

洪邁

鈞之為郎然二十四司冷熱劇易不得同日語中興時
捐不急之官省郎負七以主客合於禮部號為兩曹而
所掌猶不過牋削印瑞郊廟禮文與士子科舉事日所
程判其多不能以百天明省門開繇大丞相以下畢入

聽治吾同舍郎南典選北理財文書鱗午吏四繞不少
置獨儀曹之廷可設翳罔予方理蠹簡呻咄畢作書生
事業倦則偃一榻上遲食時矍起摩睡眼以出卒食舒
舒而行伺丞相上馬已即去至無毫毛可用以為勤以
白長官者其官同祿之入又同而佚勞相絕顧如此顏
之不厚難矣哉廳壁當有記以謹歲月識名氏今亡有
也問諸掌故掌故不知蓋其官閒其吏緩閒與緩相遭
苟且頽靡非一日實然予訪老吏質太史越數月而後

頗得其梗槩乃探建炎以來至于今日自祖秀實始并書其幸甚云紹興三十年七月八日記

禮部郎官廳記

黃疇若

紹興三十年洪內翰邁昉作中興以來禮部郎官廳壁記自建炎元年六月至開禧三年四月由祖秀實而下凡八十七人題字竟及跌後來無以書今國子戴司業溪廼伐石以續而題其名於端屬余記歲月于上惟禮部有儀曹郎蓋古春官之屬魏齊及唐多選名士典領

雖不治文書比他曹為閒暇然極其至要則協禮樂以
贊宗伯治神人以和上下至於事筆研於其間者亦必
廉悍俊拔如柳宗元劉禹錫輩乃稱是豈細事思厥艱
大反不若縱橫計財甲乙論刑之為易易耳故廣前誌
之未盡冀方來之知勉使牽聯詩書業履光大以對于
前聞人顧不偉歟母徒指睡睫曰丞相上馬去吾事畢
矣開禧丁卯九月丙戌豫章黃某記

朝奉郎蘓軾可守禮部郎中誥 王震

爾議論文章卓然名世而失職浸久所學未伸今茲命
爾為郎以待不次之選孔子曰如或知爾則何以哉維
爾之才不患無位

律詩

寄同年禮部趙郎中

鄭谷

仙步徐徐整羽衣小儀澄澹轉中儀
樺飄紅燼趨朝路蘭縱清香宿省時
彩筆煙霞供不足綸闈鸞鳳訝來遲
自憐孤宦誰相念禱祝空吟一首詩

寄禮部劉郎中

令狐楚

一別三年在上京仙垣終日選羣英除書每下皆先看
唯有劉郎無姓名

禮部員外郎

歷代沿革周官太宗伯屬官有上士蓋今員外郎之任
也後周依焉隋開皇六年置禮部員外郎煬帝改儀
曹承務郎唐武德初改禮部員外郎龍朔二年改司
禮員外郎咸亨光宅神龍隨唐改復宗諸司員外郎

正七品元仍唐宋舊置禮部員外郎

羣書要語官有秩清而選妙者其儀曹員外郎之謂乎

白集行張
元夫制

怒飛青冥翔集禁陛由茲去者十八九焉

同上

禮部郎中員外郎凡講議制度損益儀物則審覆有司

所上之狀以次諮決而質於尚書省

宋續會要

詩句移石幾回敲廢印開箱何處送新圖

唐舊說員外郎廳有大

石諸州府納廢印皆於石上碎
之又圖寫祥瑞亦員外郎所掌

古今事實

瑞錦窠

唐舊說負外郎為瑞錦窠

退朝錄

清廟器

以下係
員外郎

唐李班為殿中侍御史宰相韋處厚曰清廟之器豈擊搏材乎除禮部員外郎

文章稱首

唐劉禹錫柳文序子厚以文章稱首入為尚書禮部員

外郎又柳子厚文章卓偉精緻

職林

撰定咸服

唐韋叔夏授禮部員外郎則天將享明堂受制與當時

大儒撰定儀注衆咸推服之

唐書

少年超取

僕年二十三甚少年自御史裏行得禮部員外郎超取

顯美

柳宗元與蕭俛書

十年方轉

唐劉禹錫為禮部員外郎方與日者從容段文昌入謁

既去日者謂禹錫曰負外須待十年之後此客入相方轉正曹郎耳自是禹錫決意連受外官十餘年文昌入

相方除禹錫禮部郎中

錄異記

名德為首

唐崔澹舉止秀峙謂玉而冠者為禮部負外郎當時士夫以流品相尚惟名德者為之首

唐書

士林稱誦

宋汪大猷字仲嘉除禮部負外郎南宮名表一出士林

稱誦之

樓攻愧集

不許補館

唐許孟容德宗召為禮部員外郎有公主之子請補弘文館諸生孟容舉令式不許公主訴于上命中使問狀孟容執奏竟得遷本曹郎中

不草敵牋

宋吳懋晉陵人為禮部員外郎敵立張邦昌法當郎草牋奏公度不可拒將引繩自裁有幸非常者僂曰僕請

為之由是獲免而王時雍用事坐政事堂公發憤罵時
雍曰反虜吾不能繫汝如段秀實耶時雍面頸發赤不
能對公因以疾求罷不聽遂稱疾篤於家

中興係年錄
汪藻撰墓誌

論明堂合祭

宋王居正字剛中紹興元年除禮部員外郎上將祀明
堂公立議請合祭天地奉太祖太宗配詔禮部議定撫
州守臣言甘露降圖以聞公請卻其圖勿內臺臣繼劾

守奪其州

呂東萊
文集

言海瀆祭典

宋李文簡公燾正除禮部員外郎中興祭典未備岳鎮
海瀆先農先蠶風雨雷師九祠以酒脯代牲牢雨暘失
節郡國水災以此詔復舊

古今文集

律詩

春夕伴同年禮部趙員外直省 鄭谷

錦帳名郎重錦科清宵寓直縱吟哦水含玉鏡春寒在

粉傅仙闈月色多視草即應歸屬望握蘭知道暫經過
流鶯百轉和殘漏猶把芳樽藉露莎

禮部分掌

祠祭
醫卜

燕享
釋道

山陵致祭
度牒

忌辰
司天

廟諱

旌表

舊祠部

歷代沿革東晉而下逮於北齊皆有祠部郎後周春官
府有典祠中大夫隋有祠部郎唐改為郎中龍朔中
改為司裡大夫後復故宋祠部判司事一人以無職

事朝官充凡祠祀享祭皆隸太常禮院而天文刻漏
歸於司天監本司但掌祠祭晝日休暇令受諸州僧
尼道士女官童行之籍給剃度受戒文牒而已元豐
改制郎中負外始實行本司事叅掌天下典祀國忌
廟諱凡本司所治之事月奏祠祭晝日及休假令節
即神祠封爵號則覆太常所定以上尚書省應宮觀
寺院僧道置籍書其名額歲較賢官功過而賞罰之
元無專曹官以令史分名頭掌之

羣書要語祭以祀神人道之極也祠曹所領體莫重焉

南豐趙令鑠制追建禮之裡曹

胡文恭贈曹旭制

冰廳素號無事紹興呂本

中制

詩句又隨急詔朝天去

陳後山送鄭祠部

仰承宗廟懷祇虔晉祠

部嵇含臺中宴會

古今事實

三世為郎

賀德基世傳禮學祖文發父淹至德基三世為祠部郎

德基於禮記稱為精明

南史

二年在部

宋葉夢得字少蘊遷祠部員外郎召對上喜因問在祠部幾時對行及二年前上曰如是久乎朕即當不次擢卿後數日遂除起居郎

長編

召拜祠部

晉周捨博學尤精義理善誦詩書吏部尚書范雲重其才器言之梁武帝召拜尚書祠部郎禮儀損益多自捨

出也

命陟典祠

宋富弼子紹庭除祠部員外制云惟爾先正相予祖宗
爾少長義方習以成性詩不云乎惟其有之是以似之
朕亦何愛典祠之清選而命汝陟焉以勸夫孝於親者
往其欽哉

東都
事畧

呼為冰廳

祠部呼為冰

去聲

廳言其清且冷也

因話
錄

不博都門

唐省中語後行祠屯不博中行都門

同上

言南北郊

魏徐邈為祀部上言南北郊及論明堂宗廟毀建言皆

有證

魏志

職太廟事

晉改立太廟摯虞為祠部郎職其事

職類

才應禮樂

晉許允之字之奇才應禮樂擢為祠部郎

同上

議有故實

後魏裴脩魚祠部曹每有疑議撰斟酌咸有故實

北史

不度僧道

宋陳襄字述古號古靈先生判尚書祠部時譯經僧法

護遺表度十僧趙槩奏列于廟三年度道士襄皆執奏

不行

神宗實錄

不阿秦檜

宋胡寧文定之子遷祠部員外與秦檜議論不合時煇
為樞密檜問兒子近除如何寧曰外議以公相必不襲
蔡京之迹檜怒以言章罷

紹興
正論

論樂舞非古

姚察為尚書祠部員外舊魏王肅奏祀天地設宮懸之
樂八佾之舞至梁武帝以為事人禮縟事神禮簡古無
宮懸之文陳初承用莫有損益宣帝欲備樂付有司立
議以梁武為非時碩學名儒咸希旨察乃博引經籍獨

違羣議據梁樂為是當時莫不慙服

引經論薦新

趙彥若遷祠部員外郎先是宗廟薦新仲秋用芟萌不
經易以蒲白彥若曰蒲春始生可食秋則過時不可以

薦據引經傳改從春薦

國史

古今文集

雜著

與祠部陸員外書

韓愈

執事好賢樂善孜孜以薦進良士明白是非為已任方
今天下一人而已愈之獲幸於左右其足迹接於門牆
之間陞乎堂而望乎室者亦將一年于今矣念慮所及
輒欲不自疑外竭其愚而道其志況在執事之所孜孜
為已任者得不少助而張之乎誠不自識其言之可
采與否其事則小人之事君子盡心之道也天下之事
不可遽數又執事之志或有待而為未敢一一言也今
但言其最近而切者爾執事之與司貢士者相知誠深

矣彼之所望於執事執事之所以待乎彼者可謂至而無間疑矣彼之職在乎得人執事之志在乎進賢如得其人而授之所謂兩得其求順乎其必從也執事之知人其亦博矣夫子之言曰舉爾所知然則愈之知者亦可言已文章之尤者有侯喜者侯雲長者喜之家在開元中衣冠而朝者兄弟五六人及喜之父仕不達棄官而歸喜率兄弟操耒耜而耕于野地薄而賦多不足以養其親則以其耕之暇讀書而為文以干於有位者而取

足焉喜之文章學西京而為也舉進士十五六年矣雲
長之文執事所自知其為人淳重方實可任以事其文
與喜相上下有劉述古者其文長於為詩文麗而思深
當今舉於禮部者其詩無以為比而又工於應主司之
試其為人溫良誠信無邪佞詐妄之心強志而婉容和
平而有立其趨事靜以敏著美名而負屈稱者其日已
久矣有韋羣玉京兆之從子其文有可取者其進而未
止者也其為人賢而有材志剛而氣和樂於薦賢為善

其在家無子弟之過居京兆之側遇事輒爭不從其令而從其義求子弟之賢而能業其家者羣玉是也凡此四子皆可以當執事之首薦而極論者主司疑焉則以辨之問焉則以告之未知焉則殷勤而語之期乎有成而後止可也有沈杞者張荏者尉遲汾者李紳者張後餘者李翊者或文或行皆出羣之才也凡此數子與之足以取人望得才實主司疑焉則以解之問焉則以對之廣求焉則以告之可也往者陸相公司貢士考文章

甚詳愈時亦幸在得中而未知陸之得人也其後一二年所與及第者皆赫然有聲原其所以亦由梁補闕肅王郎中礎佐之梁舉八人無有失者其餘則王皆與謀焉陸相之考文章甚詳也待梁與王如此不疑也梁與王舉人如此之當也至今以為美談自後主司不能信人人亦無足信者故蔑然無聞今執事之與司貢士者有相信之資謀行之道惜乎其不可失也方今在朝廷者多以遊燕娛樂為事獨執事眇然高舉有深思長慮

為國家樹根本之道宜乎小子之以此言聞於左右也

禮部分掌

四方使客

舊主客

歷代沿革主客之職周有之漢置尚書郎四人其一主
匈奴單于蕃部蓋主客之任也魏有南主客晉主客
分左右南北宋置主客齊梁皆因之隋為主客郎大
業改司蕃郎文帝置主客員外郎煬帝為承務郎唐
龍朔改司蕃大夫宋主客無所掌建炎三年詔禮部

郎官一員兼主客掌諸蕃國朝貢及國信禮物并封
龍祭享之事元令史分掌名頭四方使客隸於禮部
古今事實

起家為郎

後漢何遜少有美望公府中十辟一無所就由是名重
華夏起家為尚書主客郎

主客稱職

後魏李緝為尚書南主客郎緝前後接對凡十八人頗

為稱職

庾對魏使

庾杲之為主客郎對魏使使問杲之曰百姓那得家家題門帖賣宅答曰朝廷欲掃蕩京洛克復神州所以家家賣宅魏使縮鼻而不答

范接北使

梁范胥為國子博士有口辨嘗魚主客郎應接北使

美其醞藉

匈奴使李道固至詔使主客郎范岫等接對道固等美

其醞藉

齊春秋

囚其失言

魏收為主客郎接梁使謝琨徐陵時徐陵為散騎常侍使魏魏人授館宴賓是日甚熱主客魏收嘲徐陵曰今日之熱由徐常侍來陵即荅曰昔王肅至此為魏始制禮儀今我來聘使卿復知寒暑收大慚齊文襄為相以收失言囚之數日

古今文集

古詩

寄主客張郎中

姚合

年長方慕道金丹事參差故園歸未得秋風思難持蹇
拙公府棄朴靜高人知以我齊杖屨昏旭詎相離吟詩
紅葉寺對酒黃菊籬所賞未及畢後遊良有期粲粲華
省步屑屑旅客安未同山中去固當殊路岐

律詩

寄主客劉郎中

姚合

漢朝共許賈生賢，遷謫還應是宿緣。
仰德多時方會面，拜兄何暇更論年。
嵩山晴色來城裏，洛水寒光出岸邊。
清景早朝吟牋思題詩，應費幾州牋。

寄主客員外郎

姚合

蟬稀蟲唧唧，露重思悠悠。
靜者多便夜，豪家不見秋。
同歸方欲就，微恙幾時瘳。
今日滄江上，何人理釣舟。

古今事文類聚新集卷十三